



1. april 2014

UPA 2014/20

Inatsisartut suleriaasianni § 41 imm. naapertorlugu matumuuna Inatsisartut aalajangiiffigisassaattut siunnersuut imaattoq saqqummiupparput:

Naalackersuisut suliffissaaleqinerup ataavartumik akiorneqarnissaanik siunertaqartumik ataatsimoorussamik pilersaarummik piaartumik suliarinninnissamik peqquneqarnissaannik Inatsisartut aalajangiiffigisassaattut siunnersuut. Pilersaarummi Sanaartugassanut Iluarsagassanullu Aningaasaateqarfimmi aningaasat uninngaannartut inuiaqatigiit akornanni sulisinneqalernissaannik, nunaqarfinni aalisakkerivinnik sullissinissamut isumaqatigiissutinut aningaasaliissutit amerlineqarnissaannik kiisalu illersorneqarsinnaasumik aalisagartassat amerlineqarnissaannik imaqassaaq. Pilersaarut Inatsisartut ataatsimiinneranni maanna ingerlasumi saqqummiunneqassaaq.
(Siumup Atassutillu Inatsisartunut ilaasortaaitai)

Tunggavilersuut:

Kisitsisit kingulliit takutippaat nunatsinni suliffissaaleqisut 4.420-sut, tassa suliffissaaleqisut 2013-miit 2014-mut 511-nik amerleriarsimapput. Ukiup ataasiinnaap ingerlanerani suliffissaaleqisut taama amerleriartigisimanerat akuersaarsinnaanngilarput, nunatsinni taamatut ineriartorneq akuersaarsinnaanngilarput, taamaattumik iliuseqarnissarput piffissanngortoq pimoorullugu qitiutillugulu sulisariaqalerpugut partiit tamattaalluta.

Siumup Atassutillu maluginiarpaat Inatsisartut naalackersuisuutitaqartut illuatungiliuttullu suliffissaaleqinerup annikillisarparlugu suleqatigiikkumassutsimik ataatsimooruteqarluartut.

Inatsisartunut ilaasortaasugut ataatsimoorluta suleriaqqinnissarput piffissanngorpoq, matumuunalu Naalackersuisut suleqatiberaavut.

Neriuppugut Naalackersuisunut suliffissaaleqinerup akiorneqarnissaa siunertaralugu suliniuteqarnissamik suliakkiinerput Inatsisartuni ikoqatigiilluta aqutissiuutissagipput.

Sanaartugassanut Aningaasaateqarfimmi aningaasat uninngasut atorlugit piaartumik suliffissanik pilersitsisariaqalerpugut. Nunaqarfinni suliffissanik pilersitsinissaq siunertaralugu suliffissuarnut kiffartuussinermut isumaqatigiissusiornissaq siunertaralugu Naalackersuisut aningaasanik immikkoortitsisariaqalerput. Aamma suliffissaaleqineq akiorniarlugu Naalackersuisut aalisagartassanik amerlanerusunik pisassiisariaqalerput.

Piomasaraarpullu Naalackersuisut UPA 2014-ip ingerlanerani pilersaarut Inatsisartunut ataatsimiititalianullu susassaqtartunut saqqummiunneqassasoq.



Ataatsimoorluta suliffissaaleqineq akiortigu.

Siunnersuutip aningaasaqarnikkut allaffissornikkullu kinguneqaatissai

Aallaavittut iliuusissatut pilersaarummik tuaviortumik suliaqarnissaq, piffissami sivikitsumi, ulapiffiusumilu annertuunik allaffissornikkut isumalluutinik atuiffiussasoq ilimagisariaqarpoq. Atorfilitat 15-it qaammatini marlunni ulloq tamaat atorlugu pilersaarummik suliaqartussatut naatsorsuutigineqarput. Tamanna inuit marluk affallu ukiumi ilivitsumi sulinerattut naleqarpoq, ukiumullu inummut akissarsiaq 500.000 kr.-inut missingerneqarpoq, imaluunniit katillugu 1,25 mio. kr.-ninik suliap naleqarnissaa missingerneqarluni.

Pilersarusiornermut aningaasartuutigisaq, innuttaaqatitta nunaqarfinni illoqarfinnilu najugaqartut sulilernissaat siunertaralugu ileqqaarutit isigineqassaaq.

Aningaasaqarnermut Siunnersuisooqatigiit 2013-imi misissuinerat tamatta ilisimaaraarput, taassumalu takutippaa inuk ataaseq sulileraangat pisortat 100.000 kr.-nik sipaartartut.

Taamaalilluni pilersarusiornermut aningaasartuutit pilertortumik matussuserneqassapput, soorlutaaq pilersarusiorneq inuiaqatigiinnut pitsaasumik aningaasaliinerussasoq.